


尚湖樵書



漢書門	
九	七
七	八
三	七
二	號
四	架
冊	函
架	類

內閣文庫	
九	漢
七	書
七	類
八	冊
冊	架
架	函

內閣文庫	
番號	漢 9787
冊數	24 (9)
函號	308 182

五上




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak






倘湖樵書初編卷之五日錄

蕭山毛奇齡大可氏論定

蕭山來集之元成父纂輯



治家之法

已死之軀殺賊報怨

自然之米

魚異

天然之字

自然之畫

動植泉石靈異有時日可刻

洛陽橋再修定數

蜂兆有吉有凶

濟瀆廟靈異

火能生物

闡題定數

水之乾濕靈異

撤賞金珠

草之有寶者

草木能奪天工

鳥獸蟲魚能奪天工

土木之像能神

人聲屬火

植物靈異變化

同異異同


山海經諸神

日月之異

嘗不辨仰資他人貽憂父母才之疎劣于此亦可自
考 景行錄云觀朝夕起臥之早晏可以卜人家之
興替 胡文定語楊訓曰人家最不要事事足意嘗
有些不足便是好人家纔事事足意便有不好事出
來亦消長之理然也 家養正語錄云人生至樂無
如讀書至要無如教子富者教子須是重道貧者教
子須是守節 養子弟如養芝蘭既積學以培植之
又積善以滋潤之 陸放翁曰人莫不愛其子孫愛
而不知教猶勿愛也人莫不思其父祖思而不知奉

其教猶勿思也 鶴林玉露引周益公公云漢二獻王
晉好書而其傳國最久遠士大夫家其可使讀書種
子衰熄乎 陳了翁曰與家人會食男女各爲一席
食已必舉一話頭令家人答一日問曰並坐不橫股
何也其孫女方七歲答曰恐妨同坐者 韋弦佩云
無此逍遙湯治倫理難醫之証寧耐一箇糊塗一箇
學聾一箇正經三分痴呆七分和勻用感化湯下如
前症未便卽愈再加逍遙一味服之呂新吾云心不
必太分曉纔分曉便是糊塗陳眉公云留三分正經

以度生七分痴呆以防死皆醫倫理之要藥也 葉
石林云後人但令不斷書種為鄉黨善人足矣若夫
成否則天也 世範云自古人倫賢否相雜或父子
不能皆賢或兄弟不能皆令或夫流蕩或妻悍暴少
有一家之中無此患者雖聖賢亦無如之何譬如身
有瘡痍疥癩雖甚可惡不可決去惟當寬懷處之能
知此理則胸中泰然矣古人言如此 博聞類纂云
邱寺丞訓誡一日之計乞丐卜祝一月之計童行奴
僕一時之計管絃歌曲一年之計牛馬駒犢五年之
計桑棗材木七年之計文章修讀十年之計進取官
祿三十年之計布惠修福百年之計無營無欲千萬
年之計為金為玉



已死之軀殺賊報怨

古今來義烈之士為厲鬼以殺賊挾幽恨而報怨如魏其灌夫之類往往見於正史而稗官所載尤多至於已僵之身正氣團結奮其英威直以殺鬼賊敵真出意表令見者色駭聞者竄悚則其氣可以不朽而其事固為甚奇耳予因覽党一元之事而併取其似于此者彙列于後豆棚閒話云崇禎年間陝西安塞縣党一元以剛直為團練都司時青澗縣團練南正中行多詭詐強取一婦有孕三月為之委曲設謀其

婦乃一元之妹也婦不受逼投崖而死一元具文撫軍撫軍遣役攝之正中遂反命李三竟投老獬獬賊營撫軍命一元征剿正取勝間獬賊擁至衆寡不敵一元被獲嚼舌噴血於正中之面憤絕而死正中擢聚羣賊設飲以鳴得意命其帳下卒將一元所騎之馬整頓鞍轡扶其屍仍跨馬上取一元平昔所佩雁翎刀挿于其懷軍中齊奏鼓樂南團練手擎卮酒謂之曰党都司往昔英雄無敵何至落吾手中今復能與我抗乎澆酒于其面忽此馬領鬃陲豎大嘶一聲

屋瓦欲裂党都司遂睂舉鬚張掣劍于手直斬南團練南頭落而党屍墮地仆焉舉座失色其馬出遇李三躡踏斃之馬仍哀鳴而死此崇禎末年事也 異苑云潯陽周虢字孟威寧康中鎮巴西爲符堅所獲守節不屈堅使使者道意虢躬治達陌謂使者曰煩君語賊符堅何至仰煩國士如此又潛圖襲堅堅聞之曰小人正欲覓死殺之適足成名耳乃苦拷楚不食而卒殮已經旬堅怒猶未歇剖棺臨視虢屍歛迴眸鬚髭張裂睛瞳明亮迴眸屬堅堅覩而嘉稱厚加

賻贈 綱目云晉明帝鸞建武元年九月殺鄱陽王
等七人陸超之者晉安王子懋之防閣也子懋被殺
子琳之勸超之逃亡超之曰人皆有死此不足懼吾
若逃亡非惟孤晉安之眷亦恐田橫客笑人元邈等
欲囚以還都超之端坐俟命超之門生謂殺超之當
得賞密自手刃之頭墜而身不僵元邈等厚加殯殮
門生亦助舉棺棺墜壓其首折頸而死 漁隱叢話
云花卿塚在丹稜縣之東館鎮至今猶顯英氣按花
卿字敬定本關中人唐至德間從崔光遠入蜀討段


子璋有功後平寇亂單騎塵戰喪其元猶操戈至東
館鎮下馬沃盥適遇浣紗女曰無頭何以盥爲遂自
僵仆居民墓之溪上廟祀不絕 塚廟記云黃巢之
亂廖中兄弟二人糾義兵迎敵賊斷其首猶躍馬七
里與戰今祠在湖廣崇陽縣上津渡 廸吉錄云僞
蜀節度使王宗黯貪賄生日部下皆獻貨爲賀獨巫
山令裴坦以民貧無所獻黯大怒召裴至誣以他事
生沉灩澦堆水中三日屍不流宗黯遣人挽屍而下
經宿復上卓立波面正視衙門黯不自安神識煩撓

竟得疾暴卒 江西通志云南唐時豐城王子邳爲
御史丞屬時艱虞與弟兵馬使子邛子邾統保社民
兵以衛鄉井而寇果入境子邳獨搏戰賊悉衆掩之
救不至遇害首雖斷猶挾足跨馬走五里許乃仆賊
大駭竟以是去鄉人至今祭于社 雋區云張千總
之先祖某素英果剛決以義勇爲伐鼓軍我師與敵
戰敗北張時已無首矣而志存殲敵兩手猶伐鼓不
休敗軍聞鼓聲轉厲賈壯有加因轉敗爲功遂大勝
後以功錄其子世襲廣信所千戶 吾學編景清本

姓耿陝西真寧人洪武二十七年進士第二人授翰
林編修三十年署都察院建文初署北平叅議 成
祖常晏之尋召還 成祖卽位相傳建文君出亡志
圖興復乃自詣 上 上厚遇之清藏利劍衣衽中
謀行刺先一日太史奏客星犯帝座甚急色甚紅明
明日清果衣緋獨趨入朝候 上出殿門清直前犯
駕 上驚令執之得所藏劍清奮躍嫚罵 上大怒
先抉其齒且抉且罵含血前噴乃剝其皮實以草械
繫長安門是夕 上夢清仗劍追逼晨過清繫所忽

屍索自斷前一二步若張拳冒帝者三乃焚其先墓
夷九族又藉其鄉轉相攀染謂之瓜蔓抄 王行甫
云金陵金某西域籍也世販牛往來江北道上主于
王庄某家甚相習也一日主人窺金輜重先伏二子
挾刃道旁催金蚤起赴市遇二子殺之金反抱殺者
堅莫能解相持許久有田夫起耕田見二人持道上
趨視之隣居之子與一無頭人持也屍見人至始解
抱而田夫盡知見之矣聞于官父子伏罪 輟耕錄
楊連真珈發掘宋陵之禍起于天長寺僧福聞成于

演福僧剡澤方移理宗屍時澤在旁以足蹴其首以
示無恐遂覺奇痛一點起于足心自此苦足疾數年
以致潰爛雙股墮落十指而亡聞既得致富不義之
財復倚楊髡勢豪奪產業後爲鄉夫二十人伺道遇
聞屠而鬻之罪不加衆各不過受杖而已



自然之米

五穀者種之美者也其播種刈穫之功姑勿論至以穀而成米尚亦頗費工力蓋天之示人以勞而得食也乃亦有得自地中不假人力者豈記述之附會或一時之傳訛與黃氏日抄云唐武宗時淮南旱荒百姓漉漕渠遺米呼為聖米而食之菱蒲之類食且盡而杜棕鎮淮南反表為祥此雖民稱之為聖官表之為祥然總是漕渠之遺則以豐年之狼戾補凶歲之缺陷未為大異也按宋史熙寧元年潭州益陽縣雷

震山裂出米可數十萬斛信米也但色黑如炭 惠
州府龍川縣有霍山宋循州守林須霍山記云太乙
宮巖內有穴唐會昌間穴中出米今時或有之 名
勝志云逢米巖在會昌縣東三十里深廣二丈許伏
虎禪師駐錫處有小竇相傳出米隨人多寡可給後
人鑿之僅有泉流 宋真宗乾興元年六月蕪秀二
州湖田生聖米居民取以食 又乾道四年春舒州
雨黑米堅如鐵破之米心皆黑 元至正十一年衢
州東北雨米如黍然則世固有自然之米與至天降

來麩 大麥小麥也 見于詩經 倉頡造字而天雨粟見于古

史若夏禹時天雨稻吳桓王時金陵雨五穀于貧民
家富家則不雨呂后三年秦中天雨粟漢武帝時廣
陽縣雨麥又漢光武建武三十一年九月陳留雨穀
形如稗實宋仁宗元豐二年六月忠州雨豆七月南
賓縣雨豆遼道宗咸雍四年六月壬子西北路雨穀
方三十里金大定十六年三月戊申雨豆于臨潢之
境其形上銳而赤食之味頗苦元至正十一年十一
月建寧浦城縣雨黑子如稗實邵武大雨震電雨黑

黍如蘆秫信州南黑黍鄱陽縣雨菽豆郡邑多有民
皆取而食之合之于前則或從地出或從天降母煩
播種稷耨勤動糞土之加矣若夫扶海洲上有草名
蒔其實食之如大麥從七月稔熟民歛穫至冬乃訖
名曰自然穀或曰禹餘糧此則雖云自然亦理之所
有耳仁宗嘉祐七年三月彭城縣白鶴鄉地生麵五
月鍾離縣地生麵占曰民將飢徽宗政和四年八月
建州境內竹生米數千萬石 名山記云唐有裴頭
陀者鐵履渡江居于福建永安縣山中披荆蒔劍小

庵坐側石罅日湧米二升以膳之客至則隨增後人
大其竅米遂絕所居之地名頭陀巖 名勝記云濟
南章邱縣有天倉嶺相傳戰國時齊師飢見巨蟻銜
粟前過因隨覬至嶺上遇穴發之獲粟以濟因名天
倉 湧幢小品云滋陽縣大飢衆皆携老幼逃散忽
一羽士星冠挂瓢劍過之指一隙地曰此下有土飯
可食忽不見衆駭之掘地尺餘土皆碧綠色微有穀
氣饑者捧而吞之膩如稠麵下咽甚適衆爭啜至飽
一方數千人皆取給焉地成坑且數畝深可二丈獨

不蓄水易歲麥將熟羽士忽至此俯地若有所拾坑
已滿再掘成沙土不可食矣 名山記眉州石倉在
彭山縣半山石壁間有崖竇如蜂房相傳竇中常出
米崖上刻石倉米洞四字 閩書萬歷二十年福建
連城縣姑田一里出竹米數萬斛時飢民食之得活
聞奇錄云乾符中武義縣有人入山墜子掘地二
尺來忽陷丈餘深數尺收得秫百斛莫知其由將以
釀酒其味濃厚 雲仙雜記引二賢典略云無棣有
灰山山南有石竅其中二麥取之不極

魚異

魚相依于水離水卽死不必刀刃也乃有刀刃所傷
尚復噉嚼蠕動得水尚復游泳豈水卽是命刀刃又
其次與陶朱新錄云河南廣武山漢高皇廟在其麓
殿前有八角井曰漢泉井中有三魚一金鱗一黑鱗
一如常而一邊鱗肉與骨皆無獨其首全與二魚並
遊水中但其遊差緩不復有揚鬣撥刺之勢觀者凭
欄俯窺雖異之而猶未審一日有墮井而死者因濾
之遂得三魚鱗色如在水中時半邊者五內皆無方

大異之復置井中至今三魚尚存俗傳高皇食膾庖
人治魚及半而楚軍至倉皇棄魚井中而遁此語固
無根難信然已剝之魚而游泳不死亦可怪也夢溪
筆談云越州應天寺有鰻井在一大磐石上其高數
丈井纔方數寸乃一石竅也深不可知徐浩詩云深
泉鰻井開卽此也其來亦遠矣鰻時出遊人取之置
懷袖間了無驚猜如鰻而有鱗兩耳甚大尾有刃跡
相傳黃巢曾以劍刺之凡鰻出遊越中必有水旱疫
癘之災鄉人嘗以此候之華鎮攷古云飛來山下有

石井大如盆盂無耗溢有一鰻文彩爛煥相傳下通
滄海餘姚客星山山半有華清泉一名旋井昔有人
得一鰻于井持歸鬻而烹之俄而失鰻後數日見其
游泳于井而有鬻痕疑其爲龍云奉化縣有靈濟泉
昔有牧童浣衣于泉得巨鰻持歸鬻而爲九良久失
去急往泉所視之而鰻成九節復游泉中每旱致禱
得見此鰻則雨立至宋宣和中立碑記其異
諸書所載非常之魚併列于後酉陽雜俎云同陵溪
中有魚其頭似羊俗呼羊頭魚豐肉少骨殊美于他

魚 述異記云海魚千歲爲劍魚一名琵琶魚形如琵琶而善鳴因以名焉 杜陽雜編云處士元藏機海舟壞沒飄于一島曰滄浪洲內有良金池可方數千里水石沙泥皆如金色其中有四足魚刑部員外盧得云金義嶺有池如盆其中有四足魚 遜齋閑覽云海中西物甚多人大抵以狀名之朱崖之海有物正如鞠毬大小質狀無異亦有紋如絲其味極肥美人但呼爲毬魚 霏雪錄云安南國有一種魚銳首無鱗有骨若插箭然味似河豚名戴帽魚 述征

記云城陽東南有堯母慶都之墓上有堯母祠繞墓有池池魚頰間生印謂之印頰魚 一統志陝西岷州衛有齒魚出閭井河魚有齒舌 余皇日疏云海中所產多類人身而人魚其全者也蚺青類人首眉目宛然玄羅類人足戚車類男陰文嚙類女陰文嚙卽淡菜也又名東海夫人至于貴鈴類鳳莖鍾類鹿鳩賊類象木藻類鳧更奇 名勝志龍門江在安南嘉興州蒙縣源出雲南寧遠州至此橫截江流中分三道飛湍聲聞數里旁有穴多出鸚鵡魚色青綠口

曲似鸚鵡 靈川縣水產鮪魚四足有角聲如小兒
嶺表錄異云鹿子魚有鹿班赤黃色羅州圖南海
有洲每春夏此魚躍出洲化而爲鹿曾有人拾得一
魚頭已化鹿尾猶是魚南人云魚化爲鹿肉腥不堪
食 又興安縣龍蟠山有乳洞斜貫一溪名靈水溪
溪中魚皆修尾四足丹其腹人不敢捕捕則有風雷
之變 朝野僉載云峰州有一道水從吐蕃中來夏
冷如冰雪有魚長一二寸來去有時並水上如粥人
取烹之而食千萬家取不可盡不知所從來 杭州

富陽縣韓珣莊掘井纜深五六尺土中得魚數十頭
土有微潤 東坡仇池筆記云眉州青神縣道側有
一小佛屋俗謂之猪母佛云百年前有牝猪伏于此
化爲泉有二鯉魚在泉中蓋猪龍也蜀人謂牝猪爲
母而立佛堂其上故以名之泉出石上溪不及二尺
大旱不竭而二鯉莫有見者余一日偶見之以告妻
兄王愿愿溪疑意予之誕予亦不平其見疑因與愿
禱于泉上曰余若不誕者魚當復見已而二鯉復出
愿大驚再拜謝罪而去 閩書石斑魚生南方溪澗

水石處長數寸白鱗黑斑浮游水間聞人聲則劃然
深入僧行儒言建州有石斑魚好與蛇交南中多隔
蜂窠窠大如壺常羣螫人土人取石斑魚就蜂側灸
之標于竿上向日令魚影落于窠上須臾有鳥大如
燕數百互擊其窠碎落如葉蜂亦全盡 何羅之魚
一身十首化而為鳥其名休舊竊糈于春傷墮在白
夜飛曳音聞春疾走 東方有魚其形如鯉其名為
鯨六足鳥尾繡為之母胎育厥子 南雍州誌云襄
陽有古井內一魚無肉惟骨相連 周南林纂要云

天然之字

郭相奎郡縣釋名云岳州平江縣本孫吳漢昌縣唐
置昌江縣昌水在縣北出幕阜流至南江其西南山
澗中有巨石水溢其中環繞類昌字形下流合汨水
入洞庭 漢置句容縣以縣東南有山形如句字之
曲 處州遂昌縣有孟山頭兩山前後如昌字名平
昌山吳赤烏三年置平昌縣晉改名遂昌 廣東樂
昌縣有昌山山二石相連上小下大如昌字故名曰
樂昌者以昌為樂土也 陝西商州有商山以山形

如商字一名商洛山卽秦時四皓隱處 四川巫山
縣縣南有山形如巫字卽高唐賦中所云也 巴縣
有巴江在府城東北閬水與白水合流曲折三回如
巴字唐李遠詩巴江學字流故又名文字江巴字水
每江漲登山望之點畫天然甚肖 又永川縣縣之
水三溪合而似永字 江津縣有几水卽岷江也過
縣下合涪水而東當縣治處形如几字故又謂之几
江 玉海云天寶初有獻書闕下言巴蜀之間有石
鏡見于巖之半仁壽之字昭然可觀 延平志勝云

宋韋齋先生朱松爲尤溪尉任滿假館于鄭氏建炎
庚戌九月十五日考亭夫子生焉先是文山在清印
溪濱隔溪爲公山二山草木繁密及考亭旣生野燒
同時盡焚山形畢露儼若文公二字 成都綿竹縣
有無爲山宋淳熙間碑云羣雁排空成無爲二字故
名 通江縣有公山隔江形如公字 江油縣有山
接彰明界高聳亭亭形如匡字此大匡山也 瓜水
在寧州南志謂沅江之水流自北角思永之水流自
西角轉而東南丁矣冲之俱會于茶部冲形如瓜字

故名 又寧州有登樓山蒙氏有國封爲東隅之神
山形如文字一名文峰 廣信志勝云鉛山縣白石
底絕頂上有天成八字極端楷相傳呂真人逐蛇入
穴巖中以劍劃成 南豐縣有麗禾石宋紹興四年
五月十日風雨晝合雷震石上坼裂成八字縱橫交
互不可識乃鏤板傳觀有道人辨之曰此介嘉黍稷
字也既得其譯競熟視之果然自是郡境屢豐 寰
宇記云吉水源出永安鄉北會于贛水古老傳云吉
水出有文成吉字按志十八灘水自泰和而下經

府城又東北注于墨潭爲吉文水與永豐江水之橫
出者合有清湖洲橫亘江中委蛇繚繞狀若吉字故
灘曰吉陽縣曰吉水又曰文字水又曰文江 宋仁
宗慶歷三年十二月澧州獻瑞木有文曰太平之道
英宗治平四年六月汀州進柏木板二有文曰天
下太平 紹興十四年四月虔州民毀欹屋折柱木
裏有文曰天下太平 孝宗淳熙十六年七月晉陵
民析薪中有木字曰紹熙五年如是者二是時紹熙
猶未改元其後果止五年 元成宗元貞元年太平

路蕪湖縣進榆木有文曰天下太平年 至正十六年有黍自生成文紅楷黑字其上節云天下太平其下節云天下刀兵 大歷中成都百姓郭遠 因樵獲瑞木一莖理成字曰天下太平 宣和五年福建順昌縣交溪廖懋以奉議大夫家居役夫鋸柿木爲薪有文曰聖元天何四字體製楷正墨色瑩然

洪武間臨川獻瑞木中有文曰天下平一正一反質白而文玄當有文處木理隨畫順成無錯逆者 東魏孝靜帝天平四年六月壬申齊神武如天池獲瑞

石隱起文曰六王三川 宋太宗太平興國四年九月夾山縣民王誼得黑石二皆丹文其一曰君王萬歲其二曰趙二十一帝緘其石來獻 徽宗政和二年元圭始出晉州上一石綠色方二丈餘當中有文曰堯天正其字如掌大而端楷類手畫者堯字居右天正字綴行於左都堂驗視礬石三分而字畫愈明又于堯字之下隱約出一瑞字位置始均蓋曰天正堯瑞云或謂晉陽堯都也方元圭出乃有此瑞焉建炎三年四月鼎州桃源洞大水巨石隨流而下有文

曰無爲大道天知人情無爲窈冥神見人形心言意
語鬼聞人聲犯禁滿盈地收人覓 晉史吳興戴洋
善風角庾亮鎮武昌咸康三年洋言于亮曰武昌上
地有山無林政可圖始不可居終山作入字數不及
九昔吳用壬寅來上創立宮城至巳酉還下秣陵陶
公亦陟八年土地盛衰人心去就有期不可移也公
宜更擇吉處武昌不可久住 山堂肆考唐貞觀十
七年八月梁州松昌縣鴻池谷有石書質白文成字
八十八太宗遣使祭之曰天有成命表瑞貞石文字

昭然歷數惟永又二十年陝西有石成字曰李君王
開元十九年河南登封縣石文舊有帝字新生上字
廣西富川縣有碧雲洞洞門石脉隱起廣陽島三
字遠極分明近視如擘絮狀 閩書閩縣薛老峯山
頂突起向陽峯三字周朴詩薛老峯頭三個字須知
此與石齊生直教截斷蒼苔色浮世人才始眼明薛
老薛逢也咸通中爲侯官令與僧靈觀遊創庭其側
人書其峯曰薛老云僞閩癸卯歲一夕風雨聞山上
如數千人喧噪旦則三字倒立其年閩云云 惠安

縣靈瑞山有員常院院東北麓大石上石痕濃淡隱
隱成山字怪偉可喜 政和縣佛字山石上有紋成
佛字莆田嵩山在海濱山頂有峯名文筆其上石壁
有苔文宛然文筆峯三大字刮去復明 連城縣有
蕭坑山萬歷中令徐大化築北閘鑿石此山石線中
有徐欽徐昌四大字連人異之 嘉靖甲辰秋七月
既望沙縣大路旁有巨石一片方數丈忽暴雨震
電石旁數十丈昏黑莫辨隱隱雷鳴不止約二時乃
雨晴雷止行人見石上刻五十七字大六寸皆如符

篆之文又有如禹刻者竟莫辨何字也今歲久糊模
矣 干一錄云萬歷己亥寧國府涇縣雲見四字久
之乃沒踏疲資罽 晉書張軌霸河西時張掖臨松
山石有金馬字磨滅粗可識而張字分明又有文曰
初祚天下西方安萬年姑臧又有立石白點成二十
八宿 酉陽雜俎云徑山西有石壁壁間千餘字色
黃不似鐫刻狀如蝌蚪莫有識者 杜光庭錄異記
云唐李襲譽爲涼州刺史奏昌松有瑞石自然成字
凡一百一十字內有太平天子李世民壬午年又有

貞觀昌大聖又有忠孝爲善等字勅禮部郎中柳逞
馳驛檢覆不差 王行甫云西陵三十里外大安寺
石壁黑質白文成顏氏地位四字瞭然天成其邑周
柳塘先生題其峯曰卓爾 又瑞州高安縣字山一
曰龍珠山峭壁高峻有倒寫以易二字白質黑文高
廣皆里許而又端楷不直近似 德化縣丁溪俗云
水畫丁羅簪纓宋時一夕雷雨決流一縱一橫成丁
字邑人程揚林登高第 陝西城固縣西北合流兩
水宛如文字名文水 唐齊王元吉于晉陽宮獲青

石若龜形有五丹書曰李淵石萬吉元吉遣使獻之
文字映徹高祖不信乃令水浸磨以驗之數日漬而
紅色磨之其字愈明高祖曰上天明命貺以萬吉以
少牢祀祭石龜而爵送之人 漢書昭帝時長安諸
陵栢樹枯倒者悉生枝葉蟲蝨作字云曾孫病已立
旣而昭帝崩昌邑王廢而宣帝立宣帝一名病已
智伯率韓魏攻趙時趙襄子奔晉陽原過從後至于
王澤見三人自帶以上可見自帶以下不可見與原
過竹二節莫通曰爲我以是送趙無卹原過以告襄

子齋三日親自剖竹有朱書曰余霍太山陽侯天使也唐大歷中成都百姓郭遠因樵獲瑞木一莖理成字曰天下太平詔藏于秘閣齊永明九年秣陵安時寺有古樹伐以爲薪木理自然有法天德三字真州宋藝祖發迹地有樵破樹樹中有生成三字曰天下趙

自然之畫

字雖屢變其體然起於上古畫則起于後代固未嘗不因天地之自然是以有自然之字則亦有自然之畫其理一耳因臚而列之各勝志岳州慈利縣有花石在縣之武口寨石上自然有花如堆心牡丹枝葉繚繞雖精于畫者莫能及或以物擊花葉應手而碎略加拂拭其花復見重疊非一史異云宋孝宗淳熙初秀州呂氏家冰瓦有文樓觀車馬人物芙蓉牡丹萱草藤蘿之屬經日不釋元至正二十五年

二月辛亥汴梁雨木冰狀如樓閣人物冠帶鳥獸花
卉百態具備羽幢朱葆彌望不絕凡五日始解 唐
昭宗景德中滄州城墜中冰有文如畫大樹花與葉
芬敷者時人以爲其地當有兵 宋真宗景德元年
二月保順軍城壕水陷起文爲桃李花雜樹人物之
狀 宋太宗至道二年桂陽監鎔銀自湧成山峯狀
都穆云河南新安有王喬洞石皆土所成取而破
之木葉之形交錯其間文理具存若雕刻者盡山石
皆然洞之上二木亦皆化石而復產枝葉 靈川縣

西山在桂江之上其山九峯屹立丹崖蒼壁望之如
畫繪然 山堂肆考云大理府點蒼山石白質黑文
有山水草木之形溫潤如玉可琢爲屏又階州北峽
中有石青質黑理其文有松柏人物溪橋木石山林
樓閣日月之狀 朝野記畧云定海東桃州山寺相
傳安期生以醉墨洒于石上遂成桃花今名桃花石
也 記畧云儲柴墟壺于正德癸酉以吏部左侍郎
卒于南都其子灝扶柩歸海陵之第丙子塗斃攢于
墓舍丁丑十月啓而葬諸別域發視棺上變生黝墨

成繪畫文具畫家鱗皴烘染之法前則奇石古松旁
出二篠莖葉咸備左則梅株天矯稍綴數花其杪右
如左而樹差短全無花古雅蕭散非俗工所能爲後
有文隱隱未就家人驚愕走聞州大夫馳駕來觀削
而究之深入木理四境嘆異灑乃拂楮其上模其大
都藏于家廟 廣西志勝云鰲頭山俗名鷄籠山在
崇善縣城東北四里卽鰲山也屹立江心其頂有方
石長八尺四面花闌中有石紋自然成樹如丹桂狀
懸榻篇云辛丑夏金陵造海舟下令諸郡縣伐木

如臯鄉中有栢樹大十數圍亦在伐中以其艱重難
舉鋸而析之 中有觀音大士像極其端好崖石水竹
童子鸚鵡之影纖悉備具儼若圖畫此面所有合之
彼面亦無少別當事聞其異乃止勿解今以一面嵌
置縣西門僧舍殿壁中衆共瞻禮餘一面不知所在
游小朋近過如臯目擊焉 陳承曰乾州乾陵所出
栢樹子實氣味豐美其栢異于他處木之文理大者
多爲菩薩雲氣人物鳥獸狀極分明可觀有盜得一
株徑尺者值萬錢 未齋雜言云肇慶岩洞中石乳

溢出結成人物之狀者甚衆其瀕海處則有石蟹石
蛇之屬首足尾甲皆具而端溪之可以爲硯者往往
五色成文萬象皆具宛若畫 樽俎餘功云余尚書
靖知桂州時每月盈夕聞笛聲甚清遠察其聲自溪
林處大栢木中出乃伐爲枕笛聲如故公甚寶之公
季弟欲窮其怪命工鋸視但見木之文理正如人月
下吹笛像膠合之不復有聲 山東新城縣王氏科
第之盛始于少司徒見峯公公常夢仙人授丹訣自
楚撫歸出銅拳鑄爲器食頃治人失聲驚走公就視

則二拳墮地 牝牡相合成山焉有岫有巖有洞壑有
鸞雀壽星中踞羣真環列其巔則金母坐而仙姬侍
後有洞大士入定其中所現仙真皆肖生雖雕鏤不
能及也 三柳軒筆記高州茂名縣黃沙大石嶺理
有崖樹景物宋子因帥師桂林以兩石致洪景盧老
榦扶疎上挾雲氣下臨廣漠混然天成痕無斧鑿過
求石遠矣 王行甫云姑蘓一富人韓某暑月坐堂
中令櫛工理髮忽暴雷起繞柱奮擊遲回其人驚死
復活乃堂前砌石上繪有梅花一枝紋理精妍 又

黃州一家藏有大理石屏風黑質白文成梅花一樹
其事所難工其墜瓣紛紛撼風輕颺觸日生動樹下
一巽字端楷類趙承旨書非他可及



動植泉石靈異有時日可刻

名勝志云廣州東莞亦有廬山山上有湖每甲戌日
輒聞鼓角聲又肇慶府四會縣亦有扶廬山世傳山
上有池每甲戌日聞笙簫鼓角之聲疑卽一山兩府
接壤而分記兩處 密雲縣有霧靈山每擁祥光如
霧以六月六日現土人如期候之 贛州志勝云贛
縣黃堂山有石室口方八尺如數十間屋上通天窓
下有方榻二石人巾櫛而坐旁有小石室七所相通
悉有石人室前有車馬跡春夏不草無毒蟲林木繁

茂水石幽絕山下居人每丙日輒聞室有笳鼓笙樂之音蓋靈仙窟宅也鄧德明南康記云山角石子如彈丸至丙日則不見他日皆在李元陽云畢鉢羅窟一名賓波羅窟在白崖川西山巖壁聳拔千餘丈其下林麓翳鬱無路可由南詔時有杜南蠻者卽崖而寺之捫摩巖壁上有獨木橋十餘所木如火指長三尺或五六尺巖險不敢着脚樵子偃疾者履之而過亦不損折其木非常見之材每月十五夜換橋一次不知其因十六日但見橋製一新無復舊木矣世

謂之仙橋昔寺僧畜犬仙橋斷後屏犬橋復完入蜀記云過巫山凝真觀謁妙用真人祠真人卽巫山神女也祠正對巫山峯巒上入霄漢山脚直插江中議者謂太華衡廬皆無此奇然十二峯不可悉所見八九峯惟神女峯最爲纖麗奇峭宜爲仙真所托祝史云每八月十五夜月明時有絲竹之音往來峯頂上猿鳥皆鳴達旦方漸止湘潭方廣寺每四月朔日東壁見維揚官府樓堞秦再思記異云嵩山之上有玉女搗帛石瑩徹光潔人莫能測岳下之人云

每立秋前一日中夜嘗聞杵聲響 羣芳譜云中秋
天色陰晴與外國同蘓東坡曰故人史生爲余言常
見海賈云中秋之月雖相去萬里他日會合相問陰
晴無不同者公集中有中秋詩嘗聞此宵月萬里同
陰晴天公自着意此會那可輕 方輿勝覽云雍之
洋縣念佛巖下有潭如碧鏡每歲五日巳午間忽有
泡光出色艷異甚常時則無 文昌雜錄廣州大奚
山洞端午間土人以紙墨手摸石壁覆紙刷之得咒
語藥方之類見自然方藥條下 圖經云陽江縣海

中有魚每五月五日夜悉登岸化爲鹿 建水州南
回回村有龍井每正月朔旦水中輒浮雙魚 祁陽
縣北金冲井旁有一竅每日午水溢緋魚遊泳夜半
魚匿日午又然 惠州志云惠州南海有黃雀魚常
以八月化爲黃雀至十月後復入海爲魚 泉州志
勝云德化縣五花山有端午泉每五月之朔泉水溢
至欄凡五日爲度 唐咸通間蜀僧無晦至五花山
鑿石築室與虎同居穴土得泉深數十丈味甚甘冽
端午日指井語曰此泉萬古及此日則溢而至欄吾

化後以此爲證今五月朔日則泉涸至五日盈坎院
挹注以辨千人齋翼日如故號端午泉 廣信志勝
云永豐縣六石峰上有聖泉每歲以立夏七日應期
而至有聲如雷則爲年豐之兆過期則旱冬至則泉
竭 蕭縣有天棗樹一株枝幹蟠屈數百年物正二
月之交開小花結實如酸棗可食四月初七日全樹
皆熟初八日遂空 猗園云五臺山有鐵樹定以六
月十九日開花 羣芳譜云青城山有牡丹樹高十
丈花甲一週始作花永樂中適當花開蜀獻王遣使

視之取花以回 七修類藁云予友烏鎮王天雨濟
爲橫州州判言橫之馴象衛指揮殷貫家有盆樹一
株高可三四尺幹葉皆紫黑色葉小類石楠質理細
厚問之曰此鎮樹也每遇丁卯年則花開四瓣紫白
色如瑞香較少圓耳一開累月不凋 慎蒙名山記
云洱海之內每於八月望夜河漢正中有珊瑚樹出
水面漁人往往見之世傳海龍獻寶內典云珊瑚撐
月 河州鳳林關有靈岩寺每七月十五日則流出
聖柰大如盞 鷲粟花九月九日及中秋種之花必

大又必滿 波稜菜下種于地必過月乃出其初一
二日下種與二十八九下種者皆于月過同出

千一錄云閒居數年墻之東嘉樹如蓋有鵲巢焉每
年修巢必以小雪日其梁之上必吉日也門之向歲
必更雛能飛矣鳩則逐而居之五六月鳩將雛去小
雪鵲乃復來畧無爽也 鷓鴣雖復東西廻翔命翻
之始必先南翥又飛逐月數如正月一飛而止但伏
巢中不復起矣十二月十二起 俗傳八月一日蟹
取稻芒兩枝長一二寸許東行輸送其長 簷曝偶

談云許叔微精于醫云五臟蟲皆上行惟肺蟲下行
最難治當用獺爪爲末調藥于初四日六日治之此
二日肺蟲上行也 朱平涵云鵲髡于七夕 短狐
上弩于孟夏之朔短狐卽蟻四月一日上弩八月卽
弩 徐雲林云五月五日蝦蟇必伏水草不鳴 七
月七日烏鵲則集林木不飛 海中有甲物如扇其
文如瓦屋名海扇三月三日潮盡乃出 丙日嘉魚
出穴 甲子庚申日玳瑁閉口不食 蝙蝠伏庚申
夜 鼠伏甲子夜 蝻蟲逢申日則過街 燕啣泥

避戊巳 道州舜祠遇正月元日則山狙朝廟猿亦
如之 南靖縣鰲池有祠每朔望則羣魚浮列水上
宣和士人之蠹魚石至午則堅冷爲石至巳時則
蠕動爲小蠹 李芬之未石每日至未時則氣出如
雲烟 羣芳譜藝菊法小暑至秋分看節邊蛙孔有
蟲在內用鐵線插入孔上半月向上搜下半月向下
搜又梅雨中濕熱時葉底蟲名象榦青色如蠶食葉
上半月在葉根上榦下半月在葉根下榦 物類相
感志芒種日螻蟻一齊出 九月九日蚊嘴生花

說畧云銅器入土千年純青如鋪翠其色子後稍淡
午後乘陰氣翠潤欲滴有土蝕處或穿或剝並如蝸
篆自然或有斧痕則是僞也 鳴鳩飼子曰從上而
下暮從下而上 物類相感志魚始雷向下未驚蟄
頭皆向上 土附魚清明之前眼閉過清明眼卽開
食菊之蟲朝在葉上午在葉中暮在葉下不特分
朔望也 天中記云取鷹法七月二十日爲上時內
地者多塞外者殊少八月上旬爲次時八月下旬爲
下時塞外鷹畢至矣 又鷺鷥人養之于池塘馴若

家禽至白露日卽飛騰而去有人養之或告其故不信及期果去有詩憶念幾成編集 黃閩武陵記云
武陵一孤山嶺有池魚鱉無不備者七月七日皆出
遊嶺顛族類各別

洛陽橋再修定數

朱平涵云宋蔡忠惠創洛陽橋橫亘江中選時揆日
畫基所向鏤趾所立皆豫移檄江神神得其吉告之
至鑿石伐木激浪以漲舟懸機以弦緯每有危險神
則來相趾石所累螭輒封之至今泉州人能言而公
自作橋記直言丈尺費金錢成數與年月時日首尾
不及百字噫若在今日不知許多誇張并及神異夢
寐已俗傳端明造橋移檄海神一卒應募得醋字還
解曰酉月廿一日此事亦奇然實前朝蔡錫之事名

賢錄云蔡錫字廷予鄞人中永樂癸卯鄉試入胄監
以學行選授兵科給事中陞知泉州府時洛陽橋圯
發故石有刻文云石頭腐爛蔡公再來遂捐俸修之
橋故跨海潮日奔澆施工極難錫乃爲文檄海神募
賫批者皆莫應忽一醉卒踉蹌而前曰我能往乃飲
酒大醉自没于海若有神接之者遂得批以還復于
錫上有一醋字錫妄意曰得非八月二十一日耶刻
以是日興工潮不至者旬日橋遂迄工更其名爲萬
安民德之立祠其旁配享端明錫累官至湖廣巡撫

又仁和鍾化民字維新其母夢蔡忠惠襄而生宰惠
安時洛陽橋壞渡者苦溺橋工鉅且架海難爲力化
民毅然修復之旣尅期爲文告海神海不揚波者五
日人稱神明及更新忠惠祠於座前土中得碣云五
百年後爲怪濤所折繼我者其維新焉後化民以太
常少卿巡撫河南卒于官 上特賜祠額名忠惠出
於宸斷不由擬撰而適與蔡端明之祠諡合亦可異
也然則端明之于前明蓋兩次降身矣或疑其數之
前知而端明又未嘗以前知著稱也 按鍾化民萬曆
己卯舉人庚辰

進士 閩書泉州晉江李俊育鳳池里人以貲豪里中而急爲義縣洛陽橋壯橋也歲久海沙日積橋趾下沒而風潮過當水常漫橋不得涉守馮禎以委俊育俊育出貲高之幾五尺餘凡費貲萬計今其子孫多衣冠而鳳池之李爲華族然則洛陽橋之在于前明蓋三次大修矣 按忠惠母盧氏忠惠於慶歷初爲諫官有除授非當者屢封還仁宗遇忠惠益厚曰有子如此母賢可知特賜冠帔以處之又忠惠子旬妻劉氏者員外昇之女也忠惠故與員外善員外以女

許旬旣員外死家益落忠惠知福州特就劉尋婚劉以非偶辭忠惠不可具奩送劉命旬娶員外女以歸而旬天子傳方二歲劉撫教之六經子史皆使貫串傳以養母早乞致仕傳子楠出知泉州爲忠惠舊治劉已封令人白首康強傳綠髮尚茂泉州仙遊相距四舍許板輿往來奉養珍厚衆人榮之忠惠有賢母毓之子先而其後有賢媳有賢孫有賢曾孫洛陽橋之造留澤旣廣食報亦深矣 閩書又云泉州烏嶼四面皆水嶼上可居民砌石爲沉橋宋寶祐中僧道

橋書初編 卷之三
三
詢募建石橋名鳳興盤光橋長四百餘丈廣丈六尺
比洛陽橋長加四百餘尺濶加一尺此二橋海中相
望如二虹然道詢少遇了角髯道人授以丹丸遂同
悟內典若惠安峯崎山之青龍橋獼窟嶼橋皆其所
建當獼窟未橋時與了角髯道人待渡嶼前道人曰
何不橋此曰風波日作橋不易也道人曰惠無真念
道詢遂率其徒成橋七百七十間一日建庵或欲捨
之田辭曰世間田有數我敢與人爭食哉自障白沙
海墻圍之空其高處爲庵其始障也墻爲潮嚙道詢

扇麾之曰海于天地間最大不能尺寸相讓耶遂立
退三尺然則福建之橋固有大于洛陽橋者而亦有
靈異如造洛陽橋者特洛陽橋以蔡忠惠益著耳
何匪哉曰沈存中言水以漳洛名者甚衆洛落也水
落于下謂之洛舊號洛陽九域作樂洋江後乃以洛
陽名之洛陽橋名萬安橋蔡忠惠襄所造橋心有洲
洲上有關門晉惠二邑界此江也忠惠橋記泉州萬
安渡石橋始造於皇祐五年四月庚寅以嘉祐四年
二月辛未訖功纍趾於淵醜水爲四十七道梁其長

三千六百尺廣丈有五尺翼以扶欄如其長之數而兩之靡金錢一千四百萬求諸施者余同年都給事中劉宏寶者洛陽里人爲余言幼讀書祠下嘉靖末有兵燹之變祠被賊燬碑離地四尺許石理橫裂斜倚石垣之上居久之忽自端正意有神物呵護非偶然也 懸榻篇云丹陽人姜志禮字同節萬歷己丑進士其爲泉州太守時值地震洛陽橋圯過半公鳩工更理造墩凡三十二經始之際波浸瀾漫公禱于神潮不至者數日匠師因獲措手其上某石梁舟重

水淺不克致公曰昔蔡忠惠公以八月二十一日安橋第需之至日有水滔天自東方至舟頃刻濟蓋忠惠公夙有橋斷我來修之說衆謂太守公實再來云 泉南雜志按蔡忠惠所自書萬安橋記共一百五十三言字大方尺分勒二石今在公祠聞之父老言先時二石爲倭載去後見江間發光揆之得後一石其前一石乃後人復摸故前石不如後石之瑩潤打碑時與江濤競響也 泊宅編載泉州萬安渡水濶五里蔡忠惠造石橋兩岸依山非也余往來此橋及

按端明自為記長三百六十丈非五里岸左面山非
依山右則去山尚遠也



蜂兆有吉有凶

朱平涵云凡蜂聚人家者多不和其採蜜者不與焉
謝承後漢書豫章嚴豐字孟侯為郡主簿太守賈萌
舉兵欲誅王莽有飛蜂附萌車衡豐諫以為不祥之
徵萌不從果見殺王隱晉書陶侃以袁謙為高涼太
守未至百餘里浦中有蜜蜂蔽日而下謙船上明早
進西南卒遇大風飛沙天地晦合不得還浦遂沒海
中此蜂之兆凶者也拾遺記云周武王東伐紂夜濟
時雲明如晝入百之族皆齊而船有大蜂狀如丹鳥

飛集王舟因以鳥畫其旗翌日而梟紂名其船曰蜂
舟魯哀公二年鄭人擊趙簡子得其蜂旗此其類也
爾雅翌云軍行卒逢羣蜂及飛蚤多者必驚於伏藏
之賊狀元考云宣德癸丑溫州守何文淵于明倫堂
集諸生講書有羣蜂擁一巨蜂集楹間聲聞如雷顧
謂諸生周旋曰蜂有巨儒之象來科狀元子必當之
周果及第第一斯二者乃武乃文又何蜂之能兆吉
如此哉 湖湘故事云楚王達奉馬氏詔伐吳有蜜
蜂無萬數進達傘蓋後遂戰敗死

濟瀆廟靈異

河南懷慶濟源縣道士宋本澄進紅線綵被二花銀
篋一云濟瀆廟池內浮出賜鈔六十錠勞之其池時
浮出銀幣借人如期而還則得利否則祝之不復出
且至虧折矣此名勝志所載也續耳談云濟瀆廟相
傳神通人假貸前後事不一漫誌一二祠前有大池
凡欲假金者禱于神以琰決之神許則以契券投池
中良久有銀浮而出如其數貸者持去貿易利市加
倍如期具子本祭謝而投之銀沒而原券浮出還之

如人間式亦有中保之人若神不許則投券入水頃
之券復浮還牛馬百物皆可假借投之復出故不死
也嘗有不能償者舍其兒以盆盛之投入俄頃盆子
浮起啓視之兒活于中無恙蓋神鑒其誠憫而貸其
債也盆外濕而內乾其他類此甚多予讀書至此而
疑焉夫日中爲市交易而退市道也計之以子母要
之以約質市道之囂也胡神人之不憚煩而爲之乎
及聞李濂游濟源也記而始知前所言皆過其實者
也李記云余家去濟源僅三百里數聞人獻香祠下

者云有借貸錢布浮藥以療病之事心竊疑之嘉靖
乙巳春三月計當俗所謂朝賜之期乃單騎往觀之
州縣獻香紛迭四至晝夜叫佛聲響震林谷余旣至
池上肅謁濟瀆神祠祠後有北海神殿誌謂濟瀆源
通北海故祀北海于此或曰以北海遠望而祭之也
殿前有池卽浮物之處是謂東池池西有石橋橋之
西有池曰西池皆濟水自王屋山頂流入太乙池乃
伏行地中東行九十里復見此滙爲二池地志謂東
源周迴七百步其深不測西源周迴六百八十五步

其深一丈合流至溫縣歷號公臺西南入於河自今
觀之東池卽東源周僅百餘步亦不甚深西池卽西
源周如東池深纔三四尺耳余躬躡王屋山頂觀太
乙池亦澗古今變遷乃爾邪正德初楚辰潘君棠理
懷慶嘗著辨謂春夏之交泉脉騰沸升發之氣勁疾
愈于常時故近投之物或當其衝隨沸而上此理之
常無足怪者余坐水殿竟日見布帛桃乾浮在池面
者上書姓氏年月亟取視之感三日內所投者則向
所聞浮出遠年之物皆妄傳也又見紙裹成藥浮出

以應人求者上亦有字意神靈爲之必仙書雲篆乃
皆俗筆而服之者亦罔效豈廟中人欲神其說而故
爲之耶又乞嗣者所投銀嬰兒有沉不沉者蓋銀嬰
兒皆空中其製有滲漏者必沉否則浮卽以浮沉繫
之試格他物奚不然乎潘氏謂果水之靈則當不擇
時而施何獨見于春夏之交乎其爲水泉氣盛之所
爲明矣予按獨異志云韓晉公滉鎮浙西威令大行
浙右進錢船渡江爲驚濤所溺篙工募人漉出不得
衆以錢填其數滉自至津部視之乃責江神因指其

錢曰此錢乾非水中得之者問吏吏具實對復投詞
詬責俄然二緡浮出波上遂以取之名勝志云歐陽
公四歲而孤二親俱墓吉安之瀧岡蓋其考崇公官
于綿而生歐陽子官于秦而歿此越國夫人鄭氏以
其子依叔父官于隨歐陽子年二十預隨州貢二十
四登進士歷任多在中朝及江北年四十六太夫人
卒歸祔崇公之兆塋後還潁嘗于青州刻瀧岡阡表
歸舟泊采石夜夢神人從公假觀阡表明曰水裂舟
危公悟投碑于江黃山谷爲文詰龍頃之靈龜湧碑

出沙溪沼中有龍王點跡數行如鏤取置西陽宮爲
亭以覆之後宮火獨亭無恙酉陽雜俎云李彥佐在
滄景太和九年有詔召潯陽兵北渡黃河時十二月
濟南郡使擊冰延舟冰觸舟舟覆詔失李公驚懼不
寢食六日鬢髮暴白乃令津吏不得詔盡死吏懼請
公一祝沉浮於河憑公神明以死索之李公乃令具
爵酒祝詞詰河伯曰明天子在上川瀆山岳祝史咸
秩爾河伯洎鱗之長當衛天子詔何度溺之醉冰辭
已而忽有聲如震河冰中斷可三十丈吏知李公精

誠已達乃沉鈎索之一鈎而出封角如舊惟篆印微
濕耳安有舟覆六日一酌而堅冰陷一鈎而沉詔獲
得非精誠之至乎夫江河與濟並大於域中江可以
浮出緡錢碑版河可以浮出詔紙安在濟不可以浮
出諸物哉江河之靈可以詰責之詞動之則濟之靈
寧不可以要約之券通之乎天下固有理之所無而
事之所有者此類是也冊府元龜云高齊太祖建元
元年郢州監利縣天井湖水色忽澄清出綿百姓采
以爲纈湧幢小品云陳高祖生于湖州長興下若里

其宅址猶存去太湖僅十餘里宅有井相傳始生時
井中沸出以浴帝名曰聖井有紅羅浮出焉好事者
屢爲去其翳蔽出之歸震川先生爲令往視作亭其
上勒銘焉又洪武 太祖初生三日宅邊水中浮出
紅羅因名其地爲紅羅障然則水中之浮物多矣不
得以濟瀆廟爲怪也 吳炳龍虎山記云宮南聖井
山有龍潛焉投之金銀輒浮投以楮幣則竟入苟不
虔則推出不納或出數百年物以答人又有余公井
嘉靖戊戌有獻菓禱者乃出布巾裹飯以報名山記

云天齊淵在臨淄縣東南平地泉半畝土人名曰龍池漢志齊所以爲齊以天齊也顏監曰謂其中有異如天之腹齊齊記補遺云晏子曰吾聞江溪五里海溪十里此洞與天齊此中曾浮出鐵瓦有天齊二字魏永平中出木五齊天保中出木四皆五采類栢木明弘治辛亥又出香木二焉朝野記畧云景泰三年寧德縣旱甚邑民禱雨西山龍湫疏文未善投之須臾別浮片紙乃元至正間禱雨文也其詞曰某等俯陳愚悃仰瀆龍顏乞鑒凡心願舒聖眼言念生

居在世治本于農蒙天地覆載之恩感雨露滋濡之德春耕夏耨敢辭塗足之勤秋穫冬藏實切資身之望不期茲歲忽值恒暘爰從九夏之初逮及三秋之始已經六旬不雨忍見千里揚塵石燕停飛商羊絕舞致泉源之旣竭慨旱魃之爲凶知作孽自我愚民故降災寔由上帝爰深修省特致禱祈虔取某日恭詣龍湫恪求聖水願施甘雨頓回天心大赦枯苗伏願龍顏大悅賜涓滴于金甌龜坼全消霈滂沱于壠畝庸副寔栗之詠預告大有之祥垂祐我民迓續乃

命衆爲誦之須臾大雨如注又陝西太白山間有龍池遇歲旱有司必于此祈禱乞水一罐意有不誠水自飛上樹來結成冰塊意誠則水中浮出物來持物歸候雨足仍納于池成化中西安府同知張侃往乞之水面浮出古銅盆又浮出觀音經其池週四十里四圍奇葩異卉上干雲霄每墮一葉則鴛鴦鳥成對啣出池外不容渣滓于中嘗有大魚通紅者長丈許或二丈者浮遊波面殊不怖人山極高峻官夫以繩牽逐步附之而行約二十里至頂不容肩輿上有神

神書

廟陰颯之氣襲人最有靈爽 劇談錄云咸通中京城南有二娘子湫與崖相近水波澄明莫測深淺每秋風搖落未有草木飄泛其上或覩片葉纖莖飛鳥必啣而去祈禱者多致花鈿粉黛及綺羅之類啓視投之歛然而沒 紀畧又載國初有金箔張者幼多技能嘗以鄉人不善冶金箔往學於浙之杭州歸而授諸鄉人因此得名一日經河南濟源其神號靈異人有乞貸錢物者隨所須浮出水張見之曰是烏足言神蓋伏機耳歸卽鑿池倣其制爲之已而果然每

與客玩以爲戲夫伏機于池底而發之則無春冬之分矣恐未足以破之也又廉頗墓在趙州能出物以借人比晏賓客無器用者以雞黍祀之焚其券夜往取之自金銀磁銅及桌椅之類隨券所書一一可借晏畢復設奠焚券陳所借物于墓所使人遙守之入夜皆隱去神怪莫測此又何說哉輟耕錄亦集乃路有蹇占山北多龍湫土人欲有所事則投之吉安道士學仙常至其地見有烹羔桐酪祠焉數皮沉之祝日神爲我鞣治爲期而去至期復祠則得成革

